

# DOMINGU V PÁSKUA – TINAN A

## Tema

Liturjia domingu ne'e nian konvida ita atu reflète kona-ba Igreja – comunidade ne'ebé moris husu Jezús; Igreja nia membru sira kontinua Jezús nia “dalan”, hodi fó sasin kona-ba Maromak nia projetu iha mundu, iha saran an ba Maromak, iha domin ba ema sira.

*Evanjellu* define Igreja: comunidade dixípulu sira-nian ne'ebé tuir Jezús nia “dalan” – “dalan” obediénsia nian ba Aman no saran an nian ba maluk sira. Ema sira ne'ebé simu proposta ne'e no aseita atu moris iha dinámika ida-ne'e, sai Ema Foun, tama iha Maromak nia família – família Aman, Oan no Espíritu nian.

*Leitura dahuluk* apresenta mai ita karakteristiká ruma “família Maromak nian” (Igreja): comunidade santa, maski forma husi ema maksalak sira; comunidade ida estrutura ho forma ierárkika, maibé hala'o servisu autoridade iha diálogu ho maun-alain sira; comunidade ida serví-na'in nian, ne'ebé simu don sira Maromak nian no tau don sira-ne'e atu serví maluk sira; no comunidade ida ne'ebé Espíritu nia kbiit mak anima, moris iha Espíritu no simu husi Espíritu kbiit atu sai sasin Jezús nian iha istória.

*Leitura daruak* mós refere ba Igreja: hanaran nian “templu espirituál”, iha-nee'bé Kristu mak “fatuk-inan” no sarani sira mak “fatuk moris”. Igreja ne'e forma husi “povu nai'lulik”, ho misaun atu oferese ba Maromak kultu loos: moris ida iha obediénsia ba Aman nia planu no iha domin inkondisionál ba maun-alin sira.

## LEITURA I – Apóst.6,1-7

Leitura dahuluk domingu ne'e nian hola-parte ba sesaun ne'ebé apresenta Igreja Jerusalém nia sasin. Maibé, ba dala uluk, iha Igreja ne'e mosu “elenista” sira ne'ebé iha papél fundamentál ba kristianizmu nia espansaun.

Ita-nia testu haktuir ezsita tensaun entre “ebreu” sira no “elenista” sira. Sé mak grupu rua ne'e? Sira mak membru comunidade sarani Jerusalém nian. “Ebreu” sira mak sarani orijen judaika, husi Palestina, ko'alia lia-aramaiku, lee Eskritura iha ebraiku no konverte an ba Jezús liuhusi apóstolu sira nia pregasaun. Maibé, sira kontinua kesi an ba sira-nia tradisaun no valoriza Lei no rabi sira nia interpretasaun.

“Elenista” sira mak sarani sira orijen judaika mós, maibé mai husi “diáspora” israelita – katak, comunidade judaika namkari iha impériu romanu tomak no mós, li'ur husi impériu. Sira ko'alia gregu no lee Eskritura sira iha lia-gregu. Sira hela iha Jerusalém temporariamente. Sira-nia kontaktu ho realidade kulturál seluk halo sira, sai tolerante no nakloke liután ba buat foun.

Ho grupu rua lahanesan– husi pontudevista relijiozu no sosiál –integra iha comunidade hanesan, naturál atu mosu tensaun no konflitu. Aparentemente, buat ne'ebé hamosu kestaun iha ita-nia testu mak problema materiál ida: fahe hahán ba membru kiak sira comunidade nian, feto-faluk elenista sira sente la simu atensaun. Ho keixa sira, lori atu líder sira comunidade nian halo intervensaun.

## MENSAJEN

Lucas laiha interese atu hatudu akontesimentu istórika, maibé, oferese kuadru teolójiku atu ita bele koñese Igreja nia oin no komprende oinsá nia apresenta an ba mundu. Iha perspetiva ne'e, ita hetan ideia fundamentál haat.

Dahuluk: Igreja la'ós perfeitu, maibé comunidade réal no normál, forma husi mane no feto sira, iha ne'ebé tensaun, prekonseitu, rivalidade sira, inveja sira no laran-moras marka esperiénsia loroloron ema nia dalan nian. Ita lalika hakfodak: ne'e mak rezultadu ita-nia limitasaun sira, halo parte ita-nia esperiénsia istórika. Igreja la'ós comunidade mane no feto sira ne'ebé perfeitu; maibé comunidade ida ne'ebé kontinua moris iha prosesu konversaun.

Daruak: ko'alia kona-ba estrutura ierárkika no modu hala'o servisu autoridade nian iha Igreja. Apóstolu na'in Sanulu-resin-rua iha papél orientasaun no diresaun comunidade nian. Tan ne'e, sira mosu iha istória nu'udar referénsia fundamentál, iha-ne'ebé membru sira comunidade nian bá hasoru, atu rezolve kestaun diferença entre grupu oioin. Ita iha impresaun katak sira na'in Sanulu-resin-rua la iha interese ba podér absolutu; sira buka envolve comunidade iha prosesu, hodi halo sira hotu partisipa atu buka solusaun ba problema komún sira.

Datuluk: Igreja hatudu an nu'udar comunidade ida ne'ebé serví. Testu haktuir katak sira hili mane na'in hotu "nakonu ho Espíritu Santu", no iha misaun atu serví meza. Loloos, iha epizódriu seluk mane na'in "hitu" ne'e sira serví Liafuan liufali serví meza (posivel katak ema na'in "hitu" – ho naran gregu hotu – mak dirijente comunidade sarani judeu-elenístika. Parese Lucas tau hamutuk tradisaun rua lahanesan: pregadór sira/haklaken-na'in sira nian no dirijente sira grupu elenista nian, hamutuk ho sira ne'ebé comunidade hili ba funsaun diakonál, servisu no ministériu assistensial). Maski nune'e buat ne'ebé fundamentál mak ne'e: comunidade sarani mak realidade ida ne'ebé soi iha ninia sentru dinámika serví nian – serví Liafuan no servisu assistensial ba maun-alin kiak liu. Ita labele hanoin comunidade sarani ida ne'ebé la moris loloos dimensaun diakonál.

Dahaat: papél relevante Espíritu nian durante "krize" sira kreximentu nian ne'ebé halo parte ba dalan komunitáriu. Espíritu iha ligasaun ho vokasaun (sira ne'ebé simu bolun atu hala'o diakonia – kf. Apóst. 6,3), no mós iha ligasaun ho misaun (jestu tau liman bele signifika buat rua: hetan hilin atu serví comunidade nune'e mós invokasaun Espíritu nian atu ema sira bele konkretiza misaun ne'ebé entrega ba sira). Igreja mak comunidade ne'ebé Espíritu mak kria, anima no dinamiza.

Ita-nia testu remata ho sumáriu ki'ik ida (kf. Apóst. 6,7) ho objetivu atu salienta Liafoun Di'ak ne'ebé habelar ba beibeik, liuhusi Jezús nia dixípulu sira nia hahalok no hodi Espíritu nia kbiit.

## **LEITURA II – 1 Pedro 2,4-9**

Semana ruma ona mak Surat Dahuluk Pedro nian akompaña ita-nia dalan litúrjiku. Ita hatene ona katak autór hakerek ba comunidade sarani iha zina rurál rima iha Ázia Menór; comunidade sira-ne'e maioria forma husi sarani klasse ki'ik sira, hasoru ambiente ne'ebé hahú hatudu ostilidade ba kristianizmu.

Autór fó hanoin ba destinatáriu sira surat nian, Kristu nia ezemplu, ne'ebé liuhusi krús, molok to'o iha resurreisaun. Surat tomak mak konvite ida ba esperansa: maski sarani sira hasoru terus tempu ne'e nian, sira labele dezanima, basá sira mós sei hetan glória hamutuk ho Kristu. Nune'e, sarani sira simu konvite atu enfrenta ho barani adversidade sira no moris ho fidelidade sira-nia kompromisu batizmál.

Testu ne'ebé ohin porpoin mai ita, halo parte parenétiku-doutrinál (kf. 1 Pe 2,1-10), ho finalidade husu sarani sira buras iha fiar, hodi to'o ba salvaun.

### *MENSAJEN*

Imajen/ilas determinante testu ne'e nian mak "fatuk" (vers. 4.5.6.7.8), refere ba Kristu.

Imajen ne'e lori ita ba Is 28,16, iha ne'ebé ko'alia kona-ba Templu katak, Jahwéh rasik, mak iha futuru sei harii no sei sai sinál intervensaun Maromak nian ba Povu. Isaías haklaken katak Maromak sei tau iha Siaun fatuk ida, fatuk-inan, aliserse nian, ho inskrisaun: "sé mak sadere ba nia, sei la monu". Ilas (ne'ebé Sal 118,22 foti hikis ) ne'e, iha tempu ikus judaizmu nian, foti konotasaun mesiánika: "Mesias" sei sai fatuk ne'e, iha ne'ebé Maromak sei harii ninia intervensaun salvadora iha istória, ba ninia Povu.

Autór Surat Dahuluk Pedro nian aplika ilas ne'e ba Kristu. Kristu mak fatuk ne'ebé Maromak hili, folin liu, moris (aluzaun ba moris-hi'as, signifika, mós, katak husi Nia mak suli moris ba Maromak nia Povu), no iha Nia mak Maromak harii nini intervensaun atu salva ema.

Sarani sira simu konvite atu hakbesik ba Kristu (katak, adere ba Ninia proposta, atu tuir Nia iha dalan don moris nian, atu hametin ninia komuñaun ho Kristu) no tama iha konstrusaun Kristu nia edifísiu – edifísiu espirituál, ho finalidade atu "oferese sakrifísiu espirituál monu ba Maromak nia laran" (vers. 5). Iha Templu tuan Jerusalém nain – harii ho fatuk materiál – oferese sakrifísiu balada sira-nian atu espresa komuñaun Povu nian ho Jahwéh; maibé, iha Templu foun (Kristu nu'udar fatuk-inan no sarani sira nu'udar fatuk moris), oferese sakrifísiu espirituál sira: vida ida santa, vida entrega nian ba Maromak no don nian ba maun-alin sira. Membre sira "konstrusaun" ne'e nian sei sai povu ida amlulik sira-nian, ne'ebé loroloron oferese ba Maromak buat ne'ebé folin liu iha sira: nia moris no nia domin.

"Konstrusaun" ne'e ema sira sei hewai (Jezús nia terus no mate; difikuldade sira sarani sira sei hasoru atu fó sasin fiar nian); maibé, ba Maromak, komidade/Templu ne'e sei sai "jersaun Maromak hili nanis, na'i-lulik liurai, nasaun santa, Povu ida Maromak manán atu haklaken glória sira (vers. 9). Sitasaun ne'e lori ita ba Ex 19,5-6, iha-ne'ebé refere ba komidade "alianza" nian: ninia uzu iha kontestu ne'e signifika katak, oras-ne'e, maski mundu hewai, sarani sira mak komidade "alianza foun" nian, povu ne'ebé Maromak liberta, ne'ebé Maromak hasai husi moris-atan ba liberdade no Maromak fó knaar atu fó sasin iha mundu nia oin kona-ba Ninia projetu salvasaun nian.

## **EVANJELLU – Jo 14,1-12**

Ita iha faze finál "Mesias" nia dalan iha istória. Jezús, to'o momentu ne'e, kumpre Ninia misaun iha konfrontu nakloke ho dirijente judeu sira. Sinál importante no ikus liu mak – Lázaro nia moris-hi'as – ne'ebé halo Sinédriu hakotu lia atu oho Nia (kf. Jo 11,45-54). Jezús konxiente katak mate besik daudaun.

Ambiente pasajen ne'e nian mak han-kalan despedida nian. Duran han kalan, Jezús despede ho ninia dixípulu sira no fó ba sira lia-menon ikus. Ninia Liafuan sai "testamentu" finál: Nia hatene katak Nia atu bá Aman no ninia dixípulu sira kontinua iha mundu.

Dixípulu sira, husi sira-nia parte, konxiente katak ne'e Jezús nia momentu ikus ona, laran susar no preokupadu. Aventura ne'ebé sira hahú ho Jezús, iha Galilea, to'o ona nia rohan? Relasaun ne'ebé sira harii ho "mestre" atu kotu ona? Dixípulu sira la hatene loos sá mak sei akontese nune'e mós dalan ne'ebé, husi momentu Jezús bá, sira sei foti. Liuliu, sira la hatene se, bainhira Jezús husik sira mesak, relasaun ne'ebé sira iha ho Jezús no ho Aman sei mantein eh lae.

Iha kontestu ida-ne'e mak ita bele situa Jezús nia liafuan sira ne'ebé Evanjellu ohin nian apresenta.

### *MENSAJEN*

Katekeze ohin nian, ne'ebé dezenvolve iha Jezús nia diálogu ho ninia dixípulu sira, mak katekeze kona-ba "dalan": dalan ne'ebé Jezús la'o no dalan ida-ne'e mak dixípulu sira hetan konvite atu tuir. Ita ba haree konteúdu no subliña pontu fundamentál sira.

Maromak nia planu salvasaun realiza hodi estabesele ho ema sira relasaun komuñau nian, familiaridade nian, domin nian. Tanba ne'e mak Jezús mai iha mundu: atu halo ema sira sai "Maromak nia oan" ("ba sira ne'ebé simu Nia, ba sira ne'ebé fiar iha Nia, Nia haraik kbiit atu sai Maromak nia oan sira" – Jo 1,12).

Oinsá Jezús konkretiza projetu ne'e? Nia "harii ninia horik-fatin iha ema sira leet" (Jo 1,14) no ofereba ema sira "dalan" ida moris iha plenitude: Nnia hatudu ba ema sira, iha Ninia an rasik, oinsá mak sira bele sai Ema Foun – ema be moris iha obediénsia totál ba Aman nia planu sira no iha domin ba maun-alin sira. Moris nune'e mak moris iha dinámika Maromak nian, tama iha intimidade ho Aman, sai "Maromak nia oan".

Iha han-kalan despedida nian ne'ebé ita-nia testu refere, Jezús ne'ebé sente katak hahalok ikus misaun ne'ebé Aman entrega ba Nia atu hahú daudaun ona (kria Ema Foun). Buat ne'ebé falta mak ofereba dixípulu sira lisaun ikus – lisaun domin nian ne'ebé fó to'o mate; falta mós don Espíritu nian, ne'ebé sei habiit sira atu moris hanesan Jezús, iha obediénsia ba Maromak no iha entrega ba ema sira. Atu hahalok ikus ne'e bele realiza, Jezús tenke liu husi mate: nia tenke "bá Aman". Hodi dehan "ha'u ba hadi'ak fatin ida ba imi" (vers. 2b), Jezús sujere katak nia tenke bá hasoru Aman, atu ema sira bele halo parte ba Maromak nia família.

Iha família ne'e, iha fatin ba ema hotu ("iha Ha'u Aman nia uma iha fatin barak" – vers. 2a): naran katak imi tuir Jezús nia "dalan" – katak rona Ninia proposta sira no aseita moris nu'udar Ema Foun, iha domin no iha don moris nian. "Aman nia uma" mak comunidade Jezús nia dixípulu sira (Igreja).

Sá loos "dalan" atu to'o ba halo parte Maromak nia família ne'e? – dixípulu sira husu (sira mak sasin kona-ba Jezús nia moris, tan ne'e, sira hatene "mapa" ba "dalan" ne'e; maibé sira kontinua lakohi fiar katak don moris nian mak dalan obrigratóriu atu halo parte ba Maromak nia família – vers. 4-5).

Resposta simples de'it... Jezús mak "dalan" (vers. 6): Ninia moris, jestu sira domin no laran-di'ak nian, Ninia mate (don moris nian tan domin) mak hatudu ba ema sira itineráriu ne'ebé sira tenke halo. Hodi aseita la'o tuir "dalan" identifikaun nian ho Jezús, ema sira ba hasoru lialoos no moris nakonu. Ema ne'ebé aseita atu la'o tuir "dalan" domin, saran an, don moris nian, bá to'o Aman no sai – hanesan Jezús – "Maromak nia oan".

Hodi identifika an ho Jezús, dixípulu sira estabesele relasaun íntima no familiár ho Aman, tanba Aman no Jezús ida de'it (vers. 7-12). Aman horik iha Jezús. Ema ne'ebé adere ba Jezús no estabesele ho Nia tali domin nian, nia halo parte ba Aman nia família, basá Jezús mak Maromak ne'ebé mai hasoru ema sira: Jezús nia obra sira mak Aman nia obra sira; Ninia domin mak Aman nia domin; moris ne'ebé Nia ofereba mak moris ne'ebé Aman haraik ba ema sira.

Nu'udar konkluzau: dixípulu sira tenke la'o tuir "dalan" ida, hodi bele sai Maromak nia família. Jezús hatudu tiha ona "dalan" ne'e, iha obediénsia ba Maromak no domin ba ema sira. Iha "dalan" ne'e nia rohan mak dixípulu sira – sai tiha Ema Foun – sei hasoru Aman no sei integra an iha Maromak nia família.

Jezús la'ós de'it modelu "dalan" nian; Nia mós ofereba nu'udar prezente kbiit, enerjia (Espíritu) atu ema bele la'o tuir "dalan". Ne'e mak Na'i moris-hi'as nia Espíritu ne'ebé hafoun no nakfilak ema, lora ba lora ba Ema Foun, ne'ebé moris iha obediénsia no iha domin ba maun-alin sira. Husi dinámika ne'e, moris comunidade Ema Foun sira nian, Maromak nia família, Igreja.